



INTRODUCZIUN

DA SUR ALFRED CAVELTI

40 dis cuoza la dimora da Jesus el desiart all'entschatta da sia veta publica. Quella cefra serepeta pliras gadas ellas scartiras digl Emprem e Secund Testament. 40 ei ina cefra simbolica e stat per examinaziun e cumprova.

Jesus vegn mess sill'emprova e sto sedecider. Vul el dar suatientscha alla tentaziun dil «nausch», cuntentar il regl per paun, pussonza e ventira el senn dil mund? El preferescha dad ir sia via tenor la veglia da Diu.

Il 40 dis da Cureisma envidan nus d'examinar nusezzi e secumprovar avon Diu ed ils concarstgauns. Tgei ha peisa e valeta per mei? Tgei dat senn e cuntegn a mia veta? Tgei accents valeivels dundel jeu a mia dimora sin tiara, valurs che cuozan sur quella viado?

EVANGELI

Mt 4,1–11

¹Lu ei Jesus vegnius menaus dil Spert el desiart per vegnir tentaus dil giavel. ²Suenter ver giginau curonta dis e curonta notgs ha el giu fom. ³Cheu s'avischina il tentader ad el e di: Sche ti eis Fegl da Diu, camonda che questa crappa daventi paun. ⁴Mo Jesus rispunda: Ei stat scret:

Il carstgaun viva buca mo da paun,
mobein da mintga plaid che sortescha dalla bucca da Diu.

⁵Sinquei meina il giavel Jesus el marcau sogn e tschenta el sil spitg dil tempel. ⁶Lu di el: Sche ti eis Fegl da Diu, sefiera surengiu! Ei stat gie scret:

Per amur da tei dat el camond a ses aughels,
ed els portan tei sin maun,
che ti scarpetschies buca cun in pei en in crap.

⁷Jesus di ad el: Ei stat era scret:

Ti dueis buca empruar il Segner tiu Diu.

⁸Puspei meina il giavel Jesus sin in cuolm fetg ault e muossa ad el tut ils reginavels dil mund e lur gloria. ⁹Ed el di a Jesus: Tut quei vi jeu dar a ti, sche ti sefieras per tiara ed aduras mei. ¹⁰Cheu di Jesus ad el: Naven, satan! Pertgei ei stat scret:

Il Segner tiu Diu dueis ti adurar e mo ad el dueis ti survir.

¹¹Lu ei il giavel untgius da Jesus. Ed uarda, aughels ein vegni neutier ed han surviu ad el.